


四家四六

六





同本

總領

通王總領



疏恩萬里移餉六師時急轉輸既已實關中之粟  
茲嚴守衛又將豐塞下之儲欣傳檄戟之來敢後  
緘滕之敬恭惟某官成都石荀東序河圖被天孫  
雲錦之裳文成五色植太乙青藜之杖學富羣經  
身徑上於青雲心皦如於白日方逆臣之僭叛見  
烈士之忠誠涅白不緇雖赴公山之召徻在以去  
未夷箕子之明此一息之從違實三巴之向背儻  
當時之乏此則今日之維何及觀於足兵足食之  
間尤可驗守道守官之際義如當赴馳峻阪之輕  
車事不可從屹中流之砥柱惟孟子有塞乎天地  
之氣所以浩然信汲黯可謂乎社稷之臣其以贛  
耳夷攷平生之節操已知他日之勲名常操天下  
之羸貲特其寄徑均節邦中之財用正爾知津寧  
俟席溫即觀綸召某舊慚白屋嘗共丹梯望諸公  
臺省之登一何遠矣知此士江湖之落諒亦慨然  
敢以貧身累于恩造王人序諸侯之上孰不歸依  
同年雖四海之人少希甄異其惟懷欵罔旣敷宣

漕

巽齋

賀浙西漕

升聯邃閣主計崇臺雖皇華爲原隰之馳已離天  
陛然繡衣當霄漢而立猶在長安蓋其旁贊於謀  
謨亦以外宣於風力教條甫下民意俱春恭惟某  
官忠義傳家溫恭爲德清名照世炯如冰壺玉露  
懸高秋雅望居朝所謂天球河圖在東序第欲赤  
心而報國寧嫌白首以爲郎知命不求惟有仲尼  
一人立於東門耳當朝興嘆安得鮮于百輩布在  
天下乎故於列宿之聯命此福星之使足活萬姓  
以佐大農如蕭相運於關中而寇恂施於河內一  
立京師之根本自通財用之源流漕十萬石以給  
中都何足勞其飛輓通三十年而制國用即歸展  
於經綸諒寤寐於宸心已注想於元老某冰氏之  
子坎井其天方二十五而擢第春官雖未愧退之  
之敏今十九年而不離學校亦僅同士丐之衰功  
名頓負於青春意氣俱消於閑境萬言一杯水十  
步九太行望諸公臺省之登邈乎遠矣悵此士江  
湖之落誰其念之猶幸冷官得爲下吏聞凜乎冰  
玉之操使人意消親粹乎道德之容覺我形穢當

一日賓塔之甫見知斯文命脉之已存得不歸心  
以安承教願敷時雨散爲侯類之藻芹更借春風  
使預公門之桃李

賀浙漕程郎中

恭審升聯邃閣主計崇臺雖皇華爲原隰之馳已  
同列部然繡衣當霄漢而立猶在長安蓋其勞贊  
於謀謨亦以外宣於風力教條甫下民意俱春竊  
以二浙置漕之權異乎諸道觀風之任奉承輦轂  
應千廬萬徼之須表裏江湖總七郡八州之廣按  
臨旣遠調度寔繁倘非攬轡之公曷稱臨軒之遣  
恭惟某官神襟超豁天韻清宏和氣春風著在憑  
熊之際山立玉色見于振鷺之間讞廷深得於重  
輕園府洞明於本末洎升遷於錦省益簡記於宸  
旒眷此日邊誰當膚使求之天上莫若望郎遂輟  
近班晉膺隆委旣典將輸之任亦勞綏撫之心漕  
十萬石以給中都恢乎餘地通三十年而制國用  
即此其階青甃目前黃閣足下某幸居末屬彌激  
慶悰孤枿逢春私動向陽之喜渴泂希雨乞垂借  
潤之慈抃躍惟深染濡靡竟

賀閩漕王郎中

承天子詔暫辭履錦之清班駕使者車來董飛芻  
之重寄熒煌一節照耀七閩恭惟某官文獻家傳  
才猷天賦平將淬礪初無盤錯之難洪鍾在懸自  
有鏗鏘之韻蚤從鴈序出綰虎符訪羲之靈運之  
舊游續文正龜齡之美化功疇赤仄身照紫泥三  
尺參平筆染園扉之綠九遷沓至袖携蘭握之香  
肅奉綸言屈嶺漕計游刃運解牛之智看鞭成流  
馬之勲詠四牡之閑閑暫勞攬轡扈六飛之耳耳  
一塵而爲氓今瀕海于蕃以六條而受察自天贊  
相隨地遭逢矯首連雲喜有庇身之厦屋舉頭得  
月願同近水之樓臺

通趙漕使

兼憲使

三節交輝遙望使華之重單車往戍行脩吏職之恭  
即奉教條敬馳箋記恭惟某官千齡異稟四海芳名  
師心一得於南軒制行即晞於東魯照邪古鏡與日  
爭明抱直長松到天不屈嘗觀參謀於機幕繼聞分  
命於州麾真意對民一用權衡之法精忠報國寧爲  
毫髮之欺人言翁歸之清不可干自信宣公之學不  
可負惟義所在當官而行知奮乎百世想聞其餘風

亦皆立志得如此數公參錯於天下真可太平今焉  
網舉於諸臺允矣風生於列郡蓋將漕慮民財之乏  
而持刑須讞議之平雖幹乎山海之所藏亦必曰公  
私之兼裕不究源流則取必易竭所差毫釐則死不  
可生自非存造化之公何以盡君民之責曷惟名世  
有此德心遂使荆人復見古道諒簿書期會之所報  
必無俗吏之文而錢穀斷獄之幾何行副清朝之問  
某一塵末第再玷冷官星再涉於周天績僅書於五  
載青衫勃宰半成霜葉之枯白髮蕭疎但覺雪根之  
長所忻遠役得事大賢自入乎賜履之封甚渴者望  
梅之意腹心所敬頂踵知歸大匠無弃材儻辱短轅  
之兼用小草有遠志願依直幹以爲生



憲

巽齋

賀胡檢正除浙西憲

輟屬宰司按刑畿甸刑者一成不可變豈容議讞  
之輕士制百姓于其中所賴持心之厚公膺是寄  
誰不謂宜恭惟某官球琳粹溫梗楠挺特天之高  
星辰之遠猶測其神聲以揚詩書以光愈形諸外  
教雨重濡於槐市仁風兩被於棘庭能於六一翁  
毓秀之鄉大播二千石惟良之政召還郎省即糾  
正於銓曹承弼台星遂彌綸於省闈念近地尤先  
於綏撫非大賢曷稱於平反受王嘉師司茲臬事  
三只之法安在肯深俗吏之文一歲所斷幾何行  
奉清朝之問某凄其半世冷矣一官徒以粉榆接  
清陰之孔邇繼之芹藻沾賸馥以居多雲泥之勢  
雖遼車笠之盟自若至煩餘論遍致諸公以歷時  
旁借於吹噓而一旦親逢於造化信自天之予便  
將不日以承恩歌以送之幸得見皇皇遣使臣之  
禮與其進也願曲垂恂恂於鄉黨之心

賀章泉州就除閩憲

州麾趣上憲節就移惠浹桐城考績茂兩轡之最  
榮疏芝檢平刑顓一道之權幸甚全閩得此膺使  
恭惟某官秀鍾寶婺清徹玉壺濯去塵襟飲仙掌  
露華之滑織成文采作天孫雲錦之裳政事先於  
利民議論足以追古亟上粉闈之直屢凝畫戟之  
香爇乃民庸形於眷獎鎮清原郡里閭銷愁嘆之  
聲褰赤帷裳禮樂煥光華之選况不易路遂以建  
臺風播南薰動攬轡澄清之志陽居大厦當讞刑  
欽恤之餘君子盡心焉下民無冤矣三尺之法安  
出肯深俗吏之文一歲所斷幾何行副清朝之問  
亟躋禁近茂展經綸某濫次偏州忻傳除目久辱  
眷存之舊恍驚臨照之新曾是踈庸若斯幸會河  
潤九里已沾大國之餘波我有二天尚托故人之  
巨庇

代賀豐憲

伏審泥檢自天霜臺易地刑者一成不可變豈容  
讞議之輕士制百姓于其中所賴持心之正公膺  
是寄誰不謂宜恭惟某官學造淵深氣全剛大照  
人清德炯然迎風寒露之玉壺濟世長材所謂盤  
根錯節之利器苗川風力不減毗陵閩地聲稱益  
高郎省寧屢削而抱璞無枉尺以從禽人言徐公  
之介而不知其爲通自信汲黯之直而不恤其爲  
鷲忌者衆矣名亦隨之念茲之來士論益偉三尺  
之法安出肯深俗吏之文一歲之獄幾何行奉清  
朝之間某茲因賀上敢布由衷昔嘗廁於班聯行  
並馳於原隰莫非王事願推共濟之心母玉爾音  
時賜免戾之教

代賀豐憲

倉

巽齋

賀陳郎中改除浙西倉

留行邊閫掌委邦畿傳塞外之威名擬從天下問  
民間之疾苦還自日邊雖公才無所不冝然上意  
欲以自近凡資臨照悉竊光華恭惟某官卓爾不  
羣淵乎似道元英大呂器獨得於家傳脩竹碧梧  
美更全於世濟踐揚所及譽處甚都至今吾父母  
之邦能說公仁賢之政謙勤下士食且不遑惻怛  
救荒髮爲之白繼讞疑於法寺旋握筆於郎闈斯  
民謂其不寃列宿燁其上應遂䟽異寵往控上流  
聞祖逖誓清中原已飛畫舸欲寇恂經理河內又  
趣追鋒輟遠役之虎符畀近圻之龍節驅馳甫爾  
風采凜然豈惟專斂散之權抑亦見澄清之志浙  
水百萬戶旣賴周詢城南尺五天即觀入覲徑躋  
法從允穆師虞某得趨下風不惟今日萬燈華夕  
憶初拜於遨頭一曲朱絃已辱知於焦尾每念滯  
淹之不遇若言薦達之無從忽天與於夤緣使身  
居於陶冶趨承方快自賀良多廣廈萬間已畀湖  
上龜魚之蔭丹砂九轉早成鼎邊雞犬之仙

賀羅倉部除閩倉

爾書照渥玉節疏榮乃求斯倉夙著粉闈之望亦有高原復專繡斧之權識者有聞歡然相慶恭惟某官曾涵萬卷氣無點塵抱濟世之宏才不在管仲子產之下韞憂國之正論當居賈生陸贄之間蚤以英游敷于膺仕風行碧沼渙水上以成文派接銀潢向天邊而倚玉光依日月身到蓬萊心潛充棟之牙籤目絢翔雲之奎畫即彤宸而拜命趨畫省以疇庸王言如絲我使維億寧輟班行之彥往司歛散之宜由倉部而建倉臺若分內外以星郎而爲星使遠有光華亟馳四牡之閑閑即扈六飛之耳耳某自聆除目倍激歡悰昔聯鴈塔之名復同鸚序今忝龍溪之牧密邇驪車易地相逢繫誰有此燕賀大厦何震風凌兩之虞魚傳尺書切春樹暮雲之想

通趙君

疊組交輝仰慶光華之寵一麾承乏幸依臨照之  
餘爰修事上之恭以奏由衷之記恭惟某官龍淵  
毓秀鴻寶洽聞開物成務之才了無圭角尊主庇  
民之道益有源流蚤奏最於邊城浸褻華於朝路  
告宮花囊官錦式謹司存藏武庫耀犀渠欽承匠  
監猶輟鳳閣鸞臺之選以爲天台鴈蕩之遊惟優  
御衆之仁知有足財之政方司歛散已陳陳而相  
因兼領轉輸信多多而益辦此王室股肱之托者  
豈外臺耳目之淹乎客舍西風將總送承明之入  
江南夜雨諒詳爲玉陛之陳即侍禁林以參政柄  
某未閑民事猥玷邦符正憂蒞事以面墻寧免汗  
顏而血指幸餘波及晉肯分滂澍之恩而小國事  
齊惟有依歸之意

宗使

巽齋

通西外趙判宗

屬尊麟趾率歸糾合之中郡畀龍溪幸與照臨之側敬修辭命以通姓名恭惟某官毓慶璇源分輝寶葉氣和而守正學博而用闕文采宣明死在劉向李邕之右議論濬發深得晦庵濂溪之傳名隱隱以雷霆仕駸駸乎霄漢入司天憲民自謂於不寃出綰邦符政復多於遺愛爰以東平之善遂司西外之盟磐石一強維城增重佇膺紫詔趣侍凝旒豈無他人孰若金枝之秀不有君子誰參玉鉉之崇某未習民庸猥承郡寄正自面墻於不學得無血指於旁觀尚推合治之心時賜免戾之教河潤千里豈無及晉之波厦廣萬間是亦屏周之意

市舶

巽齋

通市舶魏提舉

錦纜牙墻暫督邦珍之貢朱轡皂蓋獲依隣壁之  
輝寸心躍如尺櫝敬止恭惟某官爽邦哲匠瑞世  
竒才懷鄭公仁義之言家聲故在立漢世中興之  
業相學有傳至今吾五峯三市之氓猶誦公半刺  
十同之政謙恭下士懇切憂民洎遷清班益隆雅  
望輟工監勾稽之職洗桐城愁嘆之聲民欲借恂  
帝思見賈自合歷階而上矣奚為弭節以來斯惟  
邦計之方殷故利權之攸寄飛艎逐浪報合浦之  
珠還貢寶充庭侈南夷之琛獻乘輶底績荷橐指  
期某未習民庸猥承郡寄正自面墻於不學得無  
血指於旁觀尚推聯事之心時賜免戾之教惟餘  
波及晉肯分滲漉之恩庶小國間齊獲遂依歸之  
願



守

巽齋

漳守通泉州章郎中

丹霞照嶼行分竹使之符爛錦環城喜托寶隣之  
葩敬修辭命以通姓名恭惟某官秀毓金華標凝  
玉色仁而汎愛春隨地以俱生義或弗然松到天  
而不屈嘗以不能五十里之國壓於平分二千石  
之權責地產之所無欲利源之均認郡移文而星  
疾公執論以山堅自十旦以爭承到于今而受賜  
君子所守蓋可知矣仁人之言其利博哉又觀謚  
議於奉常不苟立言於信史文用西漢法如春秋  
遂令忠臣孝子之家榮於華袞亦使後生晚學之  
士識彼前修此雖管見於一班已覺鼎嘗於一鑿  
知鳳閣鸞臺之任必屬於公豈虎符龍節之分可  
淹于役某未閑民事猥奉邦條自惟不學以面墻  
有愧旁觀於血指惟餘波及晉肯分滲漉之恩庶  
小國間齊獲遂依皈之願

通汀守趙寺丞

千騎啓途曾叙鴈行之舊四封錯壤今依麟趾之  
仁視篆云初修辭敢後恭惟某官慶傳玉鉉秀出  
金枝天知姬旦之爲忠力扶皇祚特使臧孫之有

後以勸善人德粹於春神清如水自龍墀之入觀  
宜鷺序之升華會稍食於天官勘丹鉉於農扈不  
求捷徑遂屈專城罨畫溪頭散滿襟之和氣蕞荷  
湖畔漾萬頃之恩波况逢鳳曆之頒趣上虎符之  
最春生皂蓋樂仁者之安仁蚤復青氈覩相門之  
出相某日斜西崦恩畀南州懷組綬以來斯見吏  
民而伊始僉謂田多訟少或可偷安自惟政拙心  
勞未知攸濟孰爲規倣遂免曠瘼聽擊柝之相聞  
喜伐柯之不遠漢家磐石夙懷歸倚之勤楚國餘  
波尚丐沾濡之及

通潮州沈卿

訪晦庵之舊游實慚假守望昌黎之故壘何幸依  
仁視篆云初修辭敢後恭惟其官氣全剛大姿稟  
醇明韶鈞鏘而蛟龍翔足希古作天日明而鳳芝  
瑞蚤動羣瞻幾年薰翰墨之香一旦遂飛黃之步  
司籍匠監流聲天朝參棘寺之平亶爲司直疇稽  
卿之績足映農祥歸自玉墀起分銅竹遣惡溪之  
遺沫憩嘉木之繁陰况逢鳳曆之頒當上虎符之  
最春生海角已騰樂職之詩人自日邊促正論思  
之位某日斜西崦恩畀南州聽擊柝之相聞喜伐

柯之不遠題名鴈塔昔旣尾於同升矯首鳳城今  
尚蒙於餘潤

通興化洪監簿

假道壺山辱叙鵷行之舊承流漳水遠依熊軾之  
輝視篆云初修辭敢後恭惟某官禋身令德拔俗  
修能綴明月以爲裳絕坐點塵埃之染分雲漢而  
織錦本一家機軸之成方蜚聲翰墨之場即抗志  
功名之會龍墀入覲鷺序躋榮綸渙瓊林已足經  
常之用天低璧沼豈爲期會之煩師道尊崇帝心  
簡在胡未登於要路乃尚屈於專城適逢鳳曆之  
頒輒上虎符之最春生南國寧須荔子之再紅蚤  
入西垣坐對薇花之未紫某誤膺撫字實出揄揚  
懷組綬以來斯見吏民之伊始僉謂民溥事簡或  
可偷安自惟政拙心勞未知攸濟孰爲規儆遂免  
曠瘵聽擊柝之相聞喜伐柯之不遠得一州而如  
斗粗足回旋達四境以交輝尚幾保惠

通鄉守林寺簿

從天一札分土五峯龍虎榜中曾是難兄之接武  
鳳凰臺畔又欣子弟之同寅今辱臨父母之邦何  
啻有子孫之契久馳神於未面敢削牘以寫心恭

惟某官胄出名門望隆昭代德業久大典刑老成  
月斧雲斤綽有心工之雕鏤雪山冰谷凜然人物  
之清竒學窮百氏而無所遺器受萬鍾而虛其半  
早筮華途之仕優爲上幕之賓壯縣丞流民有神  
君之號雄藩半刺人歌別駕之功政聲亟徹於疑  
旒禁路果膺於寵錫均廩祿之稍方勘式於糧關  
董金穀之司端冠儀於農扈便應經駘蕩而入馭  
娑顧乃羞崑崙而薄蓬萊何取之廉而勇於退載  
從琳館起縮銅符上已知公姑試望之於馮翊賢  
非久外即徵黃霸於潁川可預卜於子環恐不俟  
於煖席某抽身龍江之上結廬羊角之南抖擻塵  
埃無復功名之夢摩娑松菊姑隨香火之緣望望  
前茅拳拳維梓任棠之薤一本豈能竭千慮之愚  
玉川之屋數間賸喜有二天之庇

回惠州朱郎中

兩轡相望幸聯分牧之榮十部寵臨猶篤同年之  
好方當執熱如對調冰伏惟某官六館名流一朝  
偉望光風霽月紹先天太極之傳景星慶雲示後  
學春生之象屈來羊角小試牛刀惟其心事之和  
平是以政聲之洋溢迄由邑最趣上班行瓊林足

內府之經常銅匱達諸侯之奏疏僉論惟允盍躋  
獻納之聯帝渥采隆借重蕃宣之寄此蓋竹使之  
榮也是豈桐鄉之裔耶飽惠州之飯和淵明之詩  
已高維屏前宣室之席問賈生之策伊即召環某  
麟省陳人龍溪假守靖惟僥倖實自揄揚坐逾報  
政之期罔知淑後之計欲逃司敗願惠良規終日  
七襄聊寓感藏之意明月千里益勤鄉往之情

倅

回曾倅

巽齋

承流漳水正虞共理之難播詠海沂乃竊同寅之  
助喜形于外情見乎辭伏惟某官天球粹溫月鑑  
明徹一門和氣鍾爲鸞鷲之祥萬里夷途荐覩鯤  
鵬之化所聞難弟宛如哲兄宜踵至於龍墀胡尚  
淹於驥足踐敷積歲猶爲半刺史之遊絡繹萬金  
如在太夫人之側第恐思賢之有日必令將母以  
朝天豈俟終更行即迅召某未瞻履舄實在門墻  
樞府陶鎔喜此身之有托曲江期集幸予季之同  
升茲分銅竹之符尤藉金蘭之契願同歸於盟好  
以相勉於事功儻使斯民舉遂湖山之自得則於  
別乘不惟風月之平分

回許倅

并賀

朱轡夙駕方嚴赴上之期別乘一來宜肅迓新之  
禮愧尺函之未遣辱專价之先臨拜賜甚休馳誠  
益切伏惟某官授材挺特毓德粹溫翠竹碧梧高  
韻正推於家學靈椿丹桂英名復紹於世科宜徑  
步於華途乃俯循於常調荐依蓮幙備殫贊畫之  
謀繼領花封自奏鳴絃之效且冥心於出處欲隨

道以卷舒徜徉天台鴈蕩之間依約圓嶠方壺之  
內神遊菊徑正高吟穿月脇之文天速瓜時乃自  
有縮地脉之法允謂龍溪之幸蚤爲馬首之瞻敢  
告僕夫其驅車而即至頗哀老子得袖手以蒙成  
某昔本書癡今知政拙所藉協心之治不勝引領  
之私若資糧罪履之是供敢忘專任惟社稷人民  
之所寄實竊平分

教官

巽齋

回陳教授

一馬二童方謀趨郡雙魚尺素遽辱貽緘下問燁然高情厚甚伏惟某官虞庠雋選漢殿英游懷明月佩連城久翔文價朝天津夕西極合在周行顧迂芸閣之賢再職芹宮之教惟今閩越之地若古洙泗之郊有來學校之英率是山川之秀詠歸沂水共推夫子之循循騰上雲衢行繼諸公之袞袞某屏藩所寄政教是兼儻田里有愁嘆之聲敢忘已責使城闕無挑撻之習則賴陶成

回朱教授

鴈塔題名嘗附哲兄之後龍溪分教遂紆難弟之臨特枉長牋敬承謙益伏惟某官縉雲偉望璧水名流滔滔筆下之波濤光搖月殿凜凜胷中之兵甲笑解秋闈收鶴唳之餘聲踵鱣堂之故武維茲漳水實底閩山昔遇晦庵之儒宗道原旣闡今得當家之人物風教攸新蚤爲芹泮之來佇趣薇垣之對某久焉聞譽行矣承顏赴鄭老以同襟適相邂逅繼文翁而興學尚覲討論



州官

巽齋

回趙判官

賦日五色曾驚過眼之奇在天一方喜有論心之  
便甫屢華翰溢枉高軒何惠然而肯來恍不知於  
所謝恭惟某官麟趾騰茂龍種異常烟玉壺之冰  
清爛錦囊之句蒲早浮香於籍桂真謫仙人姑婉  
畫於幕蓮屈賢公子佇膺一札穩步八埒某方此  
投閑喜於適願惟是委貺豈非過謙懼弗敢當敬  
反雙珠之贈謹錄其副永爲十襲之藏

鄭推官

三刀爲州幸戍期之消吉一賢在幕喜王事之協  
恭尺書寫心千里對面伏惟某官璠璣偉望樞紐  
名家遊刃發新研略無凝滯啖蔗入佳境寧復淹  
回聞贊畫之從容諒古今之練達佇騰薦剡徑上  
夷途某久矣知名於焉聯事念痒痾之舉切悉已  
周知况脉絡之相關可忘忠告

戴知錄

一麾出守已迫戍期千里懷賢將同僚案辱尺書  
之遠逮鏤寸臆之深銘伏惟某官才實通今學能  
貫古官雖居於糾察政必贊於中和知已勤職業

之修猶欲共詞華之習足觀操尚行慶掀騰某父  
矣知名幸焉聯事以片言而折獄所冀盡心有餘  
力則學文願安承教

董司理

假守南州方冒竹符之寵庀司秋掾幸同瓜戍之  
期賁然來思云胡不喜伏惟某官學有源委手摘  
星辰壁水濯纓宜貴名之益起蓮城糾邑豈矮屋  
之能留光奉宸恩俯揚淑問惟恕則可以及物惟  
公則可以服人三尺法苟盡心焉九萬里斯在下  
矣某竭來視篆幸此爲僚畫戟香凝敢冀專城之  
樂園靡草掬允資折獄之良

蔡司戶

虎符出守適當往戍之期騎氣前驅遂有同寅之  
幸自天贊相不我後先伏惟某官錦裳織雲玉斧  
修月爭鋒文陣夙高淡墨之題發軔華塗尚鬱飛  
黃之步邵曹借重民籍攸咨三千牘行且上聞九  
萬里其自茲始某聞名已久會面匪遙夜酌南樓  
佇結論文之約春生鈴閣更資贊畫之長

宰

巽齋

龍溪宰

三刀爲州所愧承流而宣化百里出宰忻聞學道以愛人雖郡縣之勢固殊而民社之寄則一伏惟某官璠璣令器圭組名家文有波瀾湧崑池之春水曾涵沆瀣浥月殿之秋光眷此龍溪尚淹鳧舄允謂一同之幸佇迎四輩之來某即遂同寅預忻良晤惟瘁痾之舉切諒已周知况脉絡之相關所期共理

龍巖陳宰

竹使分符方忝名藩之寄花城滌篆喜聞賢尹之來敬緝斐辭上酬榮施伏惟某官清標映玉盛德如春魏公之笏故存世傳勲業謝氏之庭不遠學有淵源自榮路之大開宜貴名之日起乃飛鳧舄以貢龍巖瓜戍趣臨即課鳴弦之奏芝封渙寵寧容俟駕而行某視事云初於民何補守令之情貴一敢忘傾蓋以相懽民社之寄不殊所賴同舟而共濟

迂牛宰

飛鳧飄墮衆知令尹之來靈鵲喧呼獨喜故人之

至伏惟某官天資甚茂經術尤明昔觀鶴在於雞  
羣風標獨異旋覩鵬搏於羊角羽翮何高一宣綵  
棒之威即上金閨之籍將以蒲城之桃李種在人  
心從知千歲之椿松對於親壽行躋華顯悉展經  
綸某自書尺之見貽僎車音之甚切已邀夜月相  
期李白之論文蒲貯春風不費杜陵之酤酒

簿尉

巽齋

林主簿

太守自謂濫叨分竹之榮主簿何如遠致維桑之  
敬欽哉高誼報以何辭伏惟某官鍾圓山漳水之  
竒似芸嶠蓬壺之彥豈應短簿而滯長身日對康  
廬把酒趁勾稽之暇暫游星堰坐曹推贊畫之良  
莫歎低回即觀識擢某皤然一老愧此雙旌既有  
幸以依仁頃復諧於識面驪龍塘畔曾爲倚馬之  
留鸚鵡洲前徒結棲鸞之想拳拳頌禱畫畫奚殫

漳浦黃尉

壺山假道首勤銜袖之投梅隱得賢且報驅車之  
近喜奉手札佇聞足音伏惟某官秀挺風規香浮  
月殿名雖蚤得寧殊山澤之癯儒志不自高何憾  
東南之一尉諒無淹久遂覩騫騰某試邵罔功同  
寅有幸道莫大於爲政不論崇卑力有餘則學文  
尚圖講切

寄居

巽齋

回寄居陳守

訪朱文公之舊游實慚假守有陳孺子之高隱何  
幸依仁書乃先焉顏其厚矣共惟某官聲名驚代  
才諳濟時槃槃學古之曾覺祕書之素蘊衮衮邁  
往之氣吞雲夢而有餘自淡墨之題名宜青雲之  
展步愛留花縣望著緹屏趣覲龍光合陪駕序朱  
轡皂蓋胡爲遠去於日邊琳宇珍臺又復逍遙於  
霞外矧騰芝檢徑縮荷囊某麟省陳人昔驚九折  
龍溪佳處今夢三刀乃逢造物之私特假見賢之  
便幸焉及戍喜甚承顏森戟凝香未敢謂專城之  
樂置水拔薤尚當師盛德之言

趙惠倅

剖龍溪之竹假守是慚詠麟趾之詩依仁何幸尺  
書遠貺寸臆深銘伏惟某官振振之英溫溫其德  
麗藻發天潢之潤蚤立脩名清芬揚月窟之輝大  
恢賢業昇飛湘水鳳翥朝陽盍序升紫禁之華乃  
借重緹屏之選和陶詩在聊寄興於東坡見賈席  
前諒承恩於北闕某適當齊戍偶在鄭鄉

二五二六

余判院

武林摻袂倏屢易於歲華漳水分符將載依於仁里已脩書而未遣沐惠翰之相先情佩一謙感深三復敬惟某官材姿敏邵政術通明粹甚天球濟以方流之潤燦然琨珮輔之幽若之華雅游多爲人稱所居能使官大踐敷滋久聲實具孚京輦司存顧叵量於步武祠庭均佚胡自歛於功名取位雖廉養德則厚諒簡知之有素當迅召之匪伊某不揆謏材冒當僻郡凝香詫蘇州之樂夫豈敢然揆薤爲龐氏之規所期勿吝

孫寺丞

濫綴虎符寧免伐檀之刺升華李寺不嫌維梓之恭爲禮過勤何言以謝恭惟某官鍾竒圓嶠飛譽名時習聖術以發身學原董賈緣人情而用法心契臯夔豈徒兼讀書讀律之長亦且全立已立人之懿蚤承清問曷謂明刑士制百姓于其中所資詳讞例者一成不可變罔泥深文載敷審克之功益茂陟明之典往承棘路將爲三尺之主盟密簡楓宸行拜九遷之渙號某昔遊麟省幸托同朝假守龍江復依仁里雖識吹噓之自未陳控謝之辭

况睹除書合修慶語先勤惠問益佩高情中心藏  
之似是孫公之尺牘景行行止式瞻于氏之高門

回楊宰

醴陵已赴官

謾稱竹使尋元晦之舊遊欲訪草元問子雲之安  
在尚稽展覲聊寫謝忱伏惟某官妙深湛之思篤  
聖哲之好粹然家學卓爾時名射策決科蚤對丹  
墀之問鳴絃製錦尚為巖邑之淹想陶柳之方濃  
而楚驛之已續聲傳回鴈焉用牛刀目送飛鳧即  
聯鷁序某濫茲假守渴甚見賢孰云會面之難失  
於交臂之頃明月千里徒勤悵望之私置水一盃  
猶幸誨言之及

回顏知縣

訪朱文公之舊遊實慚假守入顏氏子之深巷何  
幸依仁書復先焉意益厚矣恭惟某官璫璣重寶  
圭組華宗學飽羣書過謝氏詞華之秀材兼數器  
高孔門德行之科有此哲人乃從常調哦詩松下  
庭已肅於鶩行聽訟棠間屋自消於雀角所聞故  
治今尚見思諒才畢於素冠即迅馳於丹詔某適  
當齊戍偶在鄭鄉森戟凝香未敢謂專城之樂置  
水披蕤所期師盛德之言



賀冬

巽齋

賀汀州趙寺丞冬

圭躔揆景序乘七日之陽來寶華流輝恩煥五雲  
之光動一賢履此千里熙然恭惟某官聲應黃鐘  
春融皂蓋奉詔寬大細民同挾纊之溫秉節剛嚴  
老吏有折綿之凜時維亨復福已類升某才乏線  
長心隨灰暖放條海角第遠依鈴閣之晝閑問訊  
天邊當共慶玉墀之春度



圖書在版編目(CIP)數據

四家四六/[宋]方大琮等撰.—北京:北京圖書館出版社,2004.6

(中華再造善本)

ISBN 7-5013-2506-5

I. 四… II. 方… III. 駢文—作品集—中國—宋代  
IV. I222.5

中國版本圖書館CIP數據核字(2004)第050862號

ISBN 7-5013-2506-5



9 787501 325061 >

書名 四家四六(全六冊)  
著者 [宋]方大琮 等 撰

出版 北京圖書館出版社(100034 北京市西城區文津街七號)  
發行 Tel:(010)66151313 Fax:(010)66174391

E-mail: Bistfb@publicf.nlc.gov.cn  
Website: www.nlcpress.com

造紙 華寶齋  
印刷 杭州富陽古籍印刷廠

開本 八  
印張 四四·五  
版次 二〇〇四年六月第一版第一次印刷  
印數 一—二〇〇〇

書號 ISBN 7-5013-2506-5 / K·855  
定價 一四三〇圓

